

Il Grischun duai promover pli efficient il sport

La regenza pren posiziun sin ina incumbensa parlamentara da deputà Remo Cavegn (pcd Razén)

DA MARTIN CABALZAR

■ **Tenor l'intenziun da la regenza duai la promoziun dal sport en il Grischun obtegnair ina nova basa legala. En quest connex pretendan deputà Remo Cavegn (pcd Razén) ed ulteriurs 78 (!) deputadas e deputads l'elavuraziun d'ina strategia generala per la promoziun dal sport en il Grischun.** Entant che la regenza vulesse stgaffir l'emprim ina lescha ed alura definir la strategia è deputà *Remo Cavegn* da l'avis ch'i dovria l'emprim in cler concept ed ina clara strategia avant che stgaffir ina nova lescha. Uschia èsi da quintar che l'incumbensa procura l'emna proxima per ina viva debatta en il ravugl dal cussegli grond.

Las discussiuns cuntraversas en connex cun la refusa da la candidatura dal Grischun per ils gieus olimpics 2022 hajan mussà cleramain ch'i dat almain in consens quai che pertutga l'intensità da la promoziun dal sport e ch'i dettia in tschert potenzial per sviluppar il sport en il Grischun, constatescha *Cavegn*. I dettia dentant era numerusas dumondas avertas cunzunt pervi da la mancanza d'ina coordinaziun tranter il

chantun, las vischnancas e las uniuns da sport privatas.

Organisà a moda complexa

Remo Cavegn constatescha ch'il sport na sa restrenscha en il chantun Grischun betg mo a la promoziun dal sport. El haja er in'impurtanza economica e per la politica da sanadad e dal socialesser e saja perquai organisà a moda complexa. Entaifer il chantun s'occupian plirs posts cun programs e cun projects per la promoziun dal sport e dal moviment. La finanziaziun da stabiliments da sport sco hallas da gimnastica e piazzas da sport saja savens chausa da las vischnancas sut il titel da la scola entant che stabiliments da sport d'impurtanza chantunala vegnian confinanziads da l'uffizi per economia e turissem. Stabiliments privats vegnian la finala sustegnids or dal fondo da sport. Per l'unic stabiliment da sport ch'il chantun posseda saja percenter respunsabel l'uffizi da furmaziun media-superiura. Per arranschaments dal sport da prestaziun saja puspè l'uffizi da scola populara e sport respunsabel, per infrastrukturas pli grondas dentant l'uffizi per economia e turissem. Quel promova er occur-

renzas pli grondas entant che la promoziun d'occurrentas da massa vegn finanziada da daners dal fondo da sport. Entant che temas sco fairness e prevenziun da doping èn chausa dal departament da scola e sport èn la segirezza ed il doping incumbensas dal departament da giustia, segirezza e sanadad. Er il sport da scola vegn tgirà tut tenor stgalim da trais differents uffizis. E la finala datti er in basegn da coordinaziun cun la confederaziun d'ina vart e cun las vischnancas da l'autra vart.

Deputà *Remo Cavegn* è persuadi ch'ina gestiun unitaria ed ina coordinaziun da tut ils posts involvids premettia ina strategia generala interdepartamentala, ina concepziun a lunga vista concernent il svilup dal sport en il Grischun.

Mancanza d'in cler concept

En il sector dals stabiliments da sport manca in concept chantunal che preschenta e priorisescha il basegn da stabiliments necessaris e che na sustegna sche pussaivel ils stabiliments betg mo durant la construcziun, mabain er durant il manaschi. Plinavon pretenda *Remo Cavegn* ina strategia a lunga vista

tge occurrentas pli grondas che duain vegnir pridas en mira u tge occurrentas che duain vegnir garantidas e tge infrastrukturas che èn necessarias. Entant che las scolas da talents vegnian installadas e sustegnidas dal chantun na vegnian ils centers regionalis da prestaziun betg sustegnids, centers naziunals dentant bain.

Sco basa per la nova lescha stoppia vegnir fatga urgentamain in'analisi specifica en tut ils secturs da cooperaziun tranter il chantun, las vischnancas e las personas privatas, dals programs e projects per promover il sport ed il moviment, dal sport da prestaziun etc.

La lescha è preparada per la consultaziun

En sia posiziun conceda la regenza ch'il sport en il chantun Grischun è organisà a moda fitg complexa. La basa legala sa chattia numadamain – sco quai che l'incumbensader aveva gia constatà – en numerusas leschas, ordinaziuns e directivas. L'october 2010 saja la regenza sa declarada pronta d'acceptar l'incumbensa Rathgeb concernent il relassch d'in concept chantunal da sport. L'elaboraziun da quest concept saja era

cuntegnida en il program guvernamental 2013–2016. En connex cun las lavurs preliminaras per quest concept saja sa mussà che l'ordinaziun vertenta davart la promoziun da gimnastica e sport n'è betg pli ina basa legala sufficiente per las furmas da la promoziun moderna dal sport. Perquai haja la regenza gia respundì l'october 2012 ad ina dumonda *Zanetti* che l'emprim stoppia vegnir stgaffida ina lescha chantunala da sport.

En il fratemp sajan las lavurs vi da la nova lescha per promover il sport progredidas bain, il sboz da la nova lescha possa vegnir dà en consultaziun anc quest atun. I saja planisà ch'il cussegli grond possa tractar la materia en la sesiun da zercladur 2014. La regenza è conscienza che la lescha per promover il sport ed in concept cumplessiv per promover il sport ed il moviment stoppian vegnir fatgs en moda coordinada. I saja perquai era previs d'elavurar quest concept a moda interdepartamentala. En connex cun la consultaziun davart la lescha possa vegnir tematisada la coordinaziun da differentas mesiras da promoziun sco per exempel per occurrentas grondas e per infrastrukturas